

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

---

# Khutba Jummah

HADHRAT MUHYI-UD-DIN AL-KHALIFATULLAH  
*Munir Ahmad Azim*

20 Octobre 2017  
(29 Muharram 1439 AH)

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor « *Duahs (Partie 4)* »:

*Alhamdoulillah Summa Alhamdoulillah*, c'est purement par la grâce d'Allah ki mo pé contigne mo Khutba lors *duahs* azordi et azordi faire 4<sup>ème</sup> Khutba lors bane *duahs* ki Allah (swt) fine révèle à moi. Céki pli intéressant là-dans, sa bane *duahs* là capave trouve dans Quran Shariff, ki Allah ti révèle sa à So bane Messagers avant, et même ki peut être ena bane *duahs* ki mo pou mentionner, ki Allah ti révèle à Hazrat Massih Maoud (as) aussi, mais dans sa siècle là aussi Allah fine révèle sa bane *duahs* là à So Khalifatullah de sa siècle là.

*Alhamdoulillah*, si mo ti fausse, menteur, eski Allah ti pou révèle moi sa bane *duahs* là? Mo bane l'ennemies ki pour dire concernant sa bane *duahs* là? Eski sa aussi satanique sa? *Nawzobillah min Zaalik*. Et si zot dire ki sa satanique, alors zot croyance dans le Quran Shareef aussi fine piétiner et zot pas vaut pour lire le Quran Shareef. Dans zot imbécilité, kot zot pé humilier moi, zot alle piétine l'enseignement Quran Shareef en poussière.

Dans Quran Shariff ena ene *duah* kot pé dire dans sa *duah*: **Pas laisse ene sel infidèle vivant lors la terre.**

Par sa *duah* là, nous compran ki bane dimounes ki dans zot destin fine écrire infidélité, zot pas pou capave échapper avec sa. Bizin bien compran sa *duah* là ki zamais fine faire *duah* pour fini tous bane infidèles. Sinon comment tout sa bane dimounes là ti pou vine musulmans azordi?

En fait li veut dire ki tous bane ki dans zot destin fine écrire ki zot infidèles, enlève zot dépi dans sa le monde là pareil couma Hazrat Nuh (as) ti dire dans so *duah*. Maintenant sa bane infidèles là pou produire zenfants infidèles même, alors vaut mieux enlève zot. Sa c'est le *duah* de Hazrat Nuh (as).

Donc pour moi dans mo cas (situation), kan sa bane soi-disant défenseurs du Nizam-é-Jamaat là azir couma bane infidèles lors bane messages ki mo pé recevoir, Allah (swt) montrer moi sa *duah* là:

### **Rabbij alni Ghalebani ala Ghayri.**

*O mo Seigneur, faire moi victorieux lors bane ki étrangers avec moi.*

Et après sa ena sa deuxième révélation là à propos de: Mo victoire ki démontrer acceptation de mo *duah*.

### **Wajalni Ghalebati fid-Dunya wad-Deen.**

*Donne moi la victoire dans bane z'affaires le monde et dans z'affaires de la religion aussi.*

### **Wajalni naafe-an fi hazehit tejara.**

*O Allah faire sa transaction là vine profitable pour moi.*

Ici, pas veut dire transaction dans sa le monde là. Mais *duah* dans Quran ena 'azaabin alim'. Sa pé réfère à sa *duah* là même.

### **Rabbi salitni alan-Naar.**

*O mo Allah, faire moi gagne supériorité lors punition du feu.*

C'est-à-dire, faire sa difé là vine sous Mo commandement.

Ena ene *duah* dans Zaboor ki dans la langue hébreu et li mentionner dans Saint Matthieu aussi. So traduction comme suite: **Ô Allah, mo faire *duah* ki To donne moi le salut et délivrer moi de bane difficultés.**

Sa c'est ene prédiction ki fine faire dans forme ene *duah*. Donc, fine ena beaucoup *duahs* aussi Allah (swt) fine dirige moi pour mo trouver et aussi de par So grand sagesse, Li fine révèle moi aussi kot Li fine montrer moi sa *duah* là: **Ô mo Seigneur, manifester Toi lor moi, manifester Toi lor moi.**

Et puis fine montrer moi sa *duah* là:

**Allaahumma in ahlakta haadhi hil-isaah bata falan tuhbada fil-ardi abada.**

*Ô mo Seigneur, Si to laisse To bane serviteurs périr dans sa la guerre là, alors pas pou ena personne pour faire To vrai Ibaadat.*

Sa c'est *duah* ki Hazrat Mohammad (saws) ti faire avec Allah avant la guerre de Badr. *Ô mo Seigneur, Si to laisse To bane serviteurs périr dans sa la guerre là, alors pas pou ena personne pour faire To vrai Ibaadat.* Et sa même *duah*, moi aussi mo pé enseigne mo Jamaat pou faire.

***Ô mo Seigneur, Si to détruire sa Jamaat là (ki fine reconnait la Manifestation Divine, et sa humble serviteur ki To fine envoyer dans sa siècle là), alors pas pou reste personne ki pour faire To éloges et pou remercier Toi pour sa faveur ki To fine fer dans sa siècle là.***

Donc, ene Jamaat pas juge li par so nombre, ou so nombre de Masjids en béton, ni faveur mondaine. Ene Jamaat d'Allah juger par so Imaan (la foi) ki li ena lors Allah même et So Messenger ki Allah fine envoyer. Li pas attache li avec bane faux dieux. Li faire tous kitchoses ki pour faire so Rab plaisir. So vrai plaisir trouve dans so Créateur et là ki ena vrai *Ibaadat* Allah. Masjid capave en tôle ou la paille pareil couma lontan dans l'époque de Hazrat Mohammad (saws), mais Imaan (la foi) ti en béton. Ki serti bel bel Masjids en béton, décorer avec bane versets Quran, mais Imaan (la foi) la paille sec. Sa bane qualité Masjids là-même ki tomber couma bane feuilles sec, branche sec. Ki serti Masjid là vide de bane *Musalli* kot la plupart pé galoupe derrière faveur mondaine. Bane versets Quran faudé pas faire décoration dans bane Masjids. Céki pli important ki bane versets Quran bizin rentre dans ou lékaire et en même temps mette en pratique sa bane versets Quran là, et aussi bane *duahs* ki Allah (swt) fine enseigne nous.

Donc, ene Jamaat ou juge li par le progrès spirituelle ki li faire sans ki li créer la haine dans lékaire bane dimounes pour montrer ki c'est zot ki pli supérieur ki l'autre.

Maintenant mo mette devant zot certains *duahs* ki Hazrat Massih Maoud (as) ti faire avec Allah (swt) et moi aussi en l'an 2003 et 2004 mo ti recevoir sa bane *duah* ki mo pé mette sa devant ou azordi.

**Rabbe arzeho jaza-an awfa.**

*O mo Seigneur, donne li tout bane récompenses.*

Dans sa *duah* là, le mot li faire référence so madame:

**Rabbe ahsan zawjati.**

*O mo Seigneur, donne mo madame la santé.*

**Rabbish fi zawjati haza wajalhaa barakaatin fis-samaaé wa barakatin fil arz.**

*O mo Seigneur, donne la santé sene madame-là et donne li bénédiction lor la terre comme dans léciel.*

**Rabbe zidni umri wa umara zawjati zyad-atan umara haza.**

*O mo Allah, augmente mo la vie et la vie de mo madame.*

**Rabbe la to zayye umri wa umraha fafazni min qulli aafatin.**

*O Allah pas gaspille mo la vie et la vie de sa madame là, sape nous de tout malheur et épargne moi de bane problème ki capave arriver. Ameen.*

Donc, voilà bane *duahs* ki ene missié capave faire pour so madame tous les jours et sa pour créer ene la paix et l'harmonie dans la caze aussi.

Faire *duahs* avec Allah (swt) comme-ci dirai ou pé trouve Li devant ou et faire *duah* sorti au fond de ou lékaire, pas seulement lors la lèvres coumsa, et l'esprit pé voyager lors les autres kitchoses. Kan Allah (swt) content avec sa dimoune là so *duah*, Li accepter so *duah*. Kan Allah (swt) accepter *duah* ene dimoune sa même ene grand miracle sa. Kan ene dimoune tombe dans ene malheur, so lékaire rempli avec douleur, et dans sa bouleversement là, kan li appelle so Seigneur, Celui-ci écoute Li. A ce moment-là, so la main vine la main Bon Dieu.

Allah, Li couma dire ene Trésor caché. Li montrer So figure à travers bane dimounes avec ki Li content, avec ki Li ena l'amour. Allah (swt) So bane signes paraite surtout kan So bane dimounes ki Li content, zot dans pénitence. Kan zot passe misère plus ki bizin, alors comprend ki Allah (swt) près pou manifester So bane signes bien vite, li bien près. Sa bane dimounes ki sacrifié zot plisse pour Allah, Allah content avec zot plisse ki ene

dimoune content so propre zenfants. Allah montrer bane kitchoses extraordinaire dans so faveur. Li montrer aussi So vigueur pareil couma ene lion ki réveiller.

Allah Li caché, et c'est sa bane dimounes là ki fer manifester Li - Li derrière milles voiles, c'est sa bane dimounes là ki faire Li paraite.

Ô mo bane très chers disciples ki trouve à travers le monde entier, vine sa bane qualité dimounes là, ki à travers zot, Allah (swt) capave manifester Li et faire Li paraite partout kot zot été et ki Allah (swt) va montrer bane kitchoses extraordinaire dans zot faveur et Li manifester So bane signes bien vite, *Insha-Allah*.

Ene l'exemple mo donne zot. Par la grâce d'Allah, ena nous bane frères et sœurs dans Tamil Nadu dans l'Inde, ki fine récemment reconnaite la véracité de sa humble serviteur et messenger là dans sa siècle là et fine prend le *Bai'at*, et ene parmi sa bane frères là, mo cher disciple, Saleem Sahib fine fer ene très joli rêve kot Allah montrer li clairement mo véracité comme So *Nabi* (prophète). Li fine fer sa rêve là après ki li fine fer plusieurs *duahs* et li fine consacrer li beaucoup dans so Namaz Tahajjud. *Alhamdoulillah*, c'est coumsa même ki ene vrai serviteur d'Allah bizin fer. Faudé ki dans bonheur et malheur et dans tous situations de so la vie, li tourne vers Allah, et certainement Allah zamais refuse ene lékaire ki sincère. Mo disciple Saleem Sahib raconter:

*"... Mo l'esprit ti bé-tchayne et mo ti pé pleurer tous les jours dans mo bane Namaz Tahajjud. Mo pas ti capave concevoir rejette Nizam-e-Jamaat, spécialement le 5<sup>ème</sup> Khalifatul Massih.*

*Huzur, mo fine étudier ou l'enseignements à travers internet doucement doucement et en même temps mo fine cause concernant sa sujet là à mo frère K. Nazeer Sahib...(et li fine mentionne plusieurs les autres personnes)... et mo madame. Au commencement zot fine objecter lor sa zaffaire là, mais après quelques jours, zot aussi zot fine trouve la véracité de ou proclamation kot **ena parmi zot fine trouve bane rêves (K. Nazeer Sahib et Janaba Mubeena)**. Mais là-aussi mo fine contigner ena bane doutes surtout concernant bane problèmes entre Zafrullah Domun Sahib et ou...*

*Entre temps, mo fine trouve dans ene rêve kot ou pé vine dans mo bureau comme ene agent de contrôle (controlling officer) et ou fine dirige ene meeting avec tous mo bane collègues de travail. Dans sa meeting là, mo ti très fier pou trouve ou comme l'agent de contrôle (le responsable) et bane dimounes, mo bane collègues fine demande moi à propos de ou. Mo fine dire: **"Li ene prophète d'Allah."** Zot fine re-demande moi encore*

**et mo fine dire zot: "Li ene prophète pour entier le monde!". Après sa, mo fine demande pou zoine/ contacter ou par email."**

*Alhamdoulillah, Summa Alhamdoulillah.* Tous sa là c'est bane moyens par lequel Allah guide n'importe ki parmi So bane serviteurs ki Li content, kot Li envie zot prend le bon chemin et prend résolution pou réforme zot la vie dans ene façon plus meilleure encore et ki zot gagne sa bénédiction exceptionnel dans zot la vie là, kot zot pé vivre ene *Lailatul-Qadr. Alhamdoulillah.* Nous pas pou fini remercier Allah pou sa.

Alors mette sa bien dans zot la tête ki zot pas pareil couma les autres dimounes. Zot ena la grâce et bénédictions d'Allah lors zot parski zot fine reconnaite Allah So Khalifa, So Messie de sa siècle là. Pense bien sa révélation là. Kan Allah avec nous, tous avec nous. *Insha-Allah*, ki Allah béni sakaine parmi nous et faire zot la vie vive dans *duahs* et aussi bane *duahs* ki fine mette devant zot, lire et faire zot madames et zenfants aussi lire, *Insha-Allah*. Ki Allah béni zot tous, et aide zot tout dans zot résolution pou change zot la vie pour ene la vie meilleur dans la spiritualité. Zot bizin raffine zot spiritualité afin ki zot vine bane lumières éclatantes kot à travers zot aussi, Allah pou dirige bane les autres dimounes vers le droit chemin, vers l'Islam, Sahih al Islam. *Insha-Allah, Ameen.*